

Galeziya

Galeziya mwaalyaraavina Pikariyikwia' Poli yavikaryakesi.

1 ¹ Nyidasaabadeinyi Polinyi yikwia da' yavikarivanige. A'mwera nyidasaabadivitainyi mi'. A'mwe pwari Gotiyai kuda' "Polimi widaasaderi dumwaihya!" kuda' sai nyidahilakakainyi mi'. Aawa. Jizaazai Kiraazitiyalyi Gotiyai Nenimaangelyi "Apozeliyaiginyi githaasakadeiginyi," nyidahila nyidahilakagilyainyi. Gotiya sai Kiraazitiyai balakeri yidikaavakelyi. ² Nimiji neya'mwera Kiraazitiyari wi'nya'nera dava mwaaihasaraji Kiraazitiyare kusilaanyangiyaihiri yihithivanigo "Neya'mweihi!" Kwaaka Galeziya piwi piwi mwaaihasaihiri "Neya'mweihi," yihithivanigo. ³ Nabaai, Gotiyai Nenimaangelyi Naanga Jizaazai Kiraazitiyalyi yanga gaimwangebawina yihyika! Sanidaare kwaamu'nanyaburi kuna tewaanya yihimwaihika! ⁴ Kiraazitiyai sahwai nemire kayaa'nanyanne'na wijaavinaka bala'. Dahaasa kayaa'nanyaraavire kayaa'nanyabwina "Padaihasamaarima!" daka bala'. Nemire Gotiyai Nenimaangere simunyavina bala'. ⁵ Gotiyai tewaanyabwi sara kya' gamire yaya' munyaba makilaana! "Yuyagaa' yuyagaa' byaannakeigi!" widaana! Naanga sahirisira!

Yagaala tewaanya' gave piri'na warike'nesi.

⁶ Akai. Sariminyina atika maru'na'manige. Gotiyai kyihithahilaka Kiraazitiyai yange'na yihigaimwaga'. Sara kyihihaimwaga' maalikegaa' "Sahwari yagalya'mavaadeina dingaka?" yawi'divi' yagaala tewaanya ge' midinya'na yawi'manigasaihi daa! ⁷ Sare' yagaala tewaanya ge' mwari'. Aawa. A'mwe pwara sarimire simunya kwalaalya yihizaavanigava. Kiraazitiyarine yagaala tewaanya'na "Nayaa yavada'galaana!" yawireva kiri' maraginyiwamanigava. ⁸ Sinnawi yagaala tewaanya'

yihitho gavesira. Nemi saina “Yagaala tewaanya aya' wamaryana!” daaza' yagaala tewaanya mudike' yihithaaza' Dikevi nemarasi'nana! Sigunyavidaasa ejeliyai mamaayai yagaala tewaanya mudike' yihithaza' Dikevi wimarasinana! ⁹Kigaa' mi'na yihitho kiri' dahaa' ayahi nayaa yihithima! Sinnawi yagaala tewaanya' yihitho' mi'na yawi'mwaa'. Nabaai dahaa' a'mwe pwai “Yagaala aya' wamaryana!” daza' yagaala ge' yihithivanikeri Dikevi wimarasinana!

¹⁰Sare' yagaala yihithiwe'na dina “A'mwera 'Poli tewaanyalyi,' yawipika!” dadi divanigeinyi daaka! Arikawi. Gotiyai niminyina “'Nebulya' dadelyi,' yawirana!” dadi divanigeinyi. “A'mwera niminyina yilaaya yipika!” yawi'muji kwaji Kiraazitiyare yaasiwa'wawinyainyi kamwaaimudika.

Poli Apozeliyari Kiraazitiyai widaasakei yima'nake'nesi.

¹¹Nya'mweihi, sare' nayaa yihithima! Yagaala tewaanya' widadinya' a'mweraavire yagaala' mika. ¹²Sare' dare'nesi. A'mwe pwari mamaarye. A'mwe pwai manyijiwaakya'. Arikawi. Jizaazai Kiraazitiyai sahwai nyibwaridaakwakelyi.

¹³Sare' dare'nesi. Kigaa' yeinyirebwi mi'na wi'ne!. Juyaraavi Ne sinnawinyaraavirebwi diraginna mididi Gotiyare kusilaanyaraavi naanna kayaa'na yadi “Sahwaraavirebwi yuna kayaaka yigalima!” dadi diraginna sara ye. ¹⁴Juyainaavirebwi diraginna yadi nimore Yisavaakiyara nyinyakwalaangeraavi wavila'na ye. Ne sinnawinyaraavire kiwinya sahwara maali'na mididaapiji sahwainyi naanna midineinyi. ¹⁵Kiri' Gotiyai gevwi yawiraka nyinaangevire munyiki kuna mwaalegaa' “Polimi yange'na wigaimwagideinyi,” yawiraka nabaai, “Nyidaayadei yima'nana!” daka nyijivwaramaarya'nei mena nyidahilakyaa'. ¹⁶Sara nyidahilakaka gamiregaa' a'mweinyi Gawaalivaangerina nyibwaridaakwa'. “Niminyina navika yawi'divisaraavi ajimya yuyangiyaraavi yagaala tewaanya' Kiraazitiyarine' widana!” daka nyibwaridaakwa'. Mi'na kanyibwaridaakwa' sagaa' Naangere yagaalya'na yiwaarasa'na a'mwe pwaraayawinna mwiye. ¹⁷Sagaa' pwara Widaasadera mi'na yima'nyaasarera. Dividaasi Nyidaasakeinyi yima'neinyi. Sagaa' Jeruzaalemina Widaasade sahwaraavi yiwaarasa'na myilaawie. Aawa. Kwaaka Areviya a'mwamaayabanna wawena divi Anga Damaazikazina ayina yagalaawena bahe. ¹⁸Naangeri kanyibwaridaakwa' kwarame dawaai da' kanyavilava' sagaa' Jeruzaalemina Pitari wija'neinyi angyiri'maasa'neinyi yilaawena wikiya gave dawaai gaminyawi mwaale. ¹⁹Sareinyi Widaasade kwalaalyara tinna mwanganyena Jemizai Naangere gahwalaangeriji Pitariji saraari tinna wangane.

²⁰Sareinyi yagaala da' yihithivanige' nebulyasi. Gotiyai kadika yuya nyu'nadaa'nyi “Kwaasi yagaala myihizivanigeinyi. (Daaina!)” yavikaryiweinyi.

²¹ Kwaaka Juthiya Jeruzaalemidaasi Kwaaka Siriya Kwaaka Siliziya anga mannikebanna wawe. ²² Saggaa' Kwaaka Juthiya mwaalyara Kiraazitiyari limwadivisara kusilaanyangiyara nimore sinnyiki manyanganye!. ²³ Sarera pwaraavire yagaala dara wi'nesa! "O, a'mwe! kayaana neyakei 'Kiraazitiyari limwabineihilyi,' widivanikei daaka! Sai 'Sabwi kayaaka yigalima!' dakei yagaala tewaanya' duthivanika!" ²⁴ Sara wi'nesa'na niminyina Gotiyari "Byaannakeiginyira," widina ye!.

Poliji Widaasade pwaraji saraavinesi.

2 ¹ Kwame pijaakuna (14) kanyavilava' nimiji Baanavaazalyi sainaai Taaitazari maarola Jeruzaalemina ayina yilaawo. ² Gotiyai sara kanyibwaridaakwa' yilaawe. Yawi'na "Nimore wawinya yagesi wawinya kuna yivanigesi yaasiwa'na nyima'nadika! Kiraazitiyare kusilaanyaraavi maremwaaidivitaro daakaji gaveraayaba kave widima! Sahwara 'Poli widade' kayaana'nyasi,' dipiji kwaji ajimya yuyangiyara Kiraazitiyari mu'nyi yipi'derera," sara yawi'na yena a'mwe naanga gaveraavi wide "Maaveraayawi sana sana widadinyainyi." ³ Sareinyijiyai Taaitazai Girikiyai mwaalaka kiri! Juyara Kiraazitiyare naangera diraginna mujina "Nimore Kiwinya' sara dinike'na gamire kilaakeji! davaana!" muji nehye!. ⁴ Muji nehyeta kiri! pwara kwaasi neya'mwera neminyawinna kima'nyikaanya kave bahe! dame maa'divisarabisara. Kiraazitiyai Jizaazai Juyaraavireburidaa'nyi kanevadaihasamaara' tewaanya mwaaiho. Damerabisara yawi'na "Kumirebwi tinna wanganawaaji Juyainaavirebwi ayina pwiyaana!" yawi'na yeva kave bahe!. ⁵ Kave bahesaraavire yagaala kadika diraginna mu'nyo. Nemi yawi'na "Juyaraavire kiwinya Maaveraavi nurihiradika! Naangere yagaala nebulya warana sahwaravina!" yawi'na yona diraginna mamidinyo.

⁶ Yi, "A'mwe naangera Kiraazitiyari wi'nadaanyainaavi maremwaaidivisara," dadivisara nimore yagaala tewaanya' aane piri' kirisiki mye'mwagye!. Nabaai sahwaravina nimi lika myage. Gotiyai a'mwe yuyaraavire sinnyavina avaa'na yade'na nimi yuyaraavina avaa'na yawi'dinya'na lika myage. ⁷ Sahwara yagaala mudika manyije!. Aawa. Kiri' dara wanganesasi. Gotiyai Pitari "Juyaraavi kilaaka daya'neraavi yagaala tewaanya' duthatheiginyi," widaasakabaabi' Poli Maaveraavi kilaaka madaya'neraavi wija'neri dahilakakelyira. ⁸ Sare! dare'nesi. Gotiyai Pitari gannya diraginya' kujaava! Widaasadei Apozeliyare wawinya yada kilaaka dayaraavi wijiwaakadevaabi' sahwai gannya diraginya' kanyijaava! Apozeliyainyire wawinya yadi ajimya yuyangiyaraavi wijiwaakadinyainyi. ⁹ Jeruzaalemi mwaalyara Kiraazitiyarera yawi'na "Jemizai, Sipaazai (Pitai), Joni nimore a'mwe naangere. Simyarera." Yawi'na kye' sahwara mwaaidivi' dara yawiresasi. Ya, Gotiyai Polimi Apozeliyare wawinya' dahilakaya'na yange'na

wigaimwagakela! Sara deva “Nemi avaaawawinya yadaanyainera,” deva Baanavaazalyi sainaari ata bwa'nyina nehye'. Nabaai dinyina “Yo, Poliji Baanavaazalyi saraai ajimya yuyangiyaraayawinna kuna wika! Nemi kilaaka dayaraayawi wawinya yaana!” Dinyina kyo naarimi “Tewaanyasi,” widina yoi. ¹⁰Yagaala piri! nehithe! “Nemijiyara nigwimaayaraavina wigaimwange'na jawirila!” Nimi sara yadinyainyi wide “Sare'na yilaaya yiwana.”

Anga Aadiyoki Poli Pitari maanga widake'nesi.

¹¹Pigaa' Anga Aadiyokina Sipazai (Pitai) bina yaka kayaa'nanya' yake'na a'mweraayaba sahwari maanga wide. ¹²Sare' dare'nesi. Sinnawi Jemizaryabadaasi pwara mabyesagaa' sai Kiraazitiyarera ajimya yuyangiyaraayaba wapaaya nyina. Wapaaya nyina yaka kiri' sahwara bina kye' sai Maaveraayaba wapaaya manyina. Sai yawi'na “Sahwara diraginna dadivisare ‘Maavera kunnya kilaakejikaavi mada'nyadivisaraayaba tika manaanera!’ ” yawi'na yaka lika yina yaka wapaaya manyina. ¹³Wapaaya manyi kya' Juyara Kiraazitiyarera pwara yawita kayaa'nanya yeva avaina manyina. Avaina manyi kye', nabaai, Baanavaazai tinna wanganna yaka diraginna mi yaka manyi yakelyi. ¹⁴Manyi kye' tinna dara wangane! “O, sahwara yagaala tewaanyavi nebulya' myadivi! nayaa yida'na myivanigasara daaka!” Sara dena a'mweraayaba Pitari wide “Juyaiginyira. Juyaigi kiri' Maaveraavirebwina tewaanna mwaimwaana. Juyaraavirebwina mamwalyiwaana. Sareigi dahaa' ayina Juyaraavirebwi yiwaanya'na ‘Ajimya yuyangiyaihi, Juyaraavirebwina dimwaalyila!’ sara divanigi. Sara be'na yivanigi!” wide.

Jizaazai Kiraazitiyari wi'nya'nera Juyaraji Maaveraji saraavi Gotiyai avaina padaihasamaa'de'nesi.

¹⁵Nenimaangera Juyara mwaaidapiji mudangegaa' Juyaina yima'no. Juyara dina “Ne Mozizare Kiwinya myadivisara kayaa'nanyarera.” Sare' Juyaina mwaidaa ajimya yuyangiyaina kayaa'nanyaina mamwaalyigoina ¹⁶kiri' dara yawi'mwosi. O, pwai Gotiyare Kiwinyabwi yada Gotiyai mujina “Yida'maraangeiginyi,” mujina. Aawa. Pwai Jizaazai Kiraazitiyari limwaga'da Gotiyai widina “Yida'maraangeiginyi,” widivanikelyira. Sare' nemi saina Kiraazitiyai Jizaazari limwamwo. “Kiwinya dinikebwi mididaa Gotiyai ‘Yida'maraangeigi,’ manejadelyi. Kiraazitiyari limwadaa Gotiyai ‘Yida'maraangeigi,’ nedana!” dona sara limwamwo. Kilaa'naka aane pwai kwai Gotiyare Kiwinya midida Gotiyai “Yida'maraangeigi,” mujinike'na Kiraazitiyari limwamwo. ¹⁷Nemi Kiraazitiyari wilamwaidaanya'na tewaanyaina nemwaahivanikeinera. Sara yadaasi Juyara nenganeva nedivaniga! “Juyaihi kiwinya' navika

yadivi! kayaa'nanyaihi Maaverabisaihi yima'niwaa! Sare' sarimire Kiraazitiyai kayaa'nanyabwi wakadelyi." Sara nedivanigasa! Gotiyai yawi'na "Arikewinyira. (Kiraazitiyai nimorebwi yadelyi.)" ¹⁸ Sare' dare'nesi. Kiwinya'na Gotiyai "Yida'maraangeiginyi," muji neyake'na Kiwinyabwi wa'di'nyi Kiraazitiyari limwadaa Gotiyai "Yida'maraangesi," nedadelyi. Nimi ayina Kiwinyabwi yiwiji kwaji kayaa'nanyabwi yadinyainyi kyima'niwidika! ¹⁹ Sare' dare'nesi. Kiwinya'na baimweinyi. "Yida'maraangeinyi yima'nima!" dena Kiwinyabwi yaamiji yaamiji yena aawano. Tewaanyainyi myima'nyiwe'na "Kiwinyabwi aalo," dena sabwina baimweinyi. "Gotiyarina gaala mwaalima!" dena sabwina baimweinyi. ²⁰ Kiraazitiyari wilamwaaiheinyina Kiraazitiyai yisavi balakegaa' nimi bainikeinyi. Sare' nimi sainyi mamwaalyige. Kiraazitiyai sahwai wilanyimwaalikeinyi. Dahaa' kilaa'nakeinyi mwaaiheinyi. Gotiyare Gawaaliki limwadi mwaaiheinyi. Sai niminyina tewaanya wivu'nakelyi. Gami sai niminyineba marimwanginaka yarai balakelyi. ²¹ Gotiyai a'mweraavina yange'na wigaimwangebwi wanganakina myiwinera! (Kiraazitiyarina yawi'dinyainyi.) Sare' dare'nesi. A'mwe pwai Kiwinyabwina nayaa yada Gotiyai "Yida'maraangelyi," widazi kwaji Kiraazitiyai yaasiwa'na kabaladika! (Kiwinyabwina Gotiyai "Yida'maraangeiginyi," muji yanne'na Kiraazitiyai neminyina bala!)

Gotiyai "Yida'maraangeihilyira," nedathevwinesi.

3 ¹ Galeziya mwaalyaihi sidu'maayaihi! Sarimire simunya ginyiwange' gara yima'niwaka! Sareihiri Jizaazai Kiraazitiyai yisavi baimwake' nimi kave yihithe' sarimi dara desa' "O, sahwai baimanikeri tinna dangamanigo!" ² Gave piri' yihu'nima! Kiwinya dinike' sara yesa'na Gotiyare Kuryari maaresaihi daa! Aawa, yagaala tewaanya' kadika wi'neva Kiraazitiyari limwaga'divi' gannya Kuryari yihizaava'. ³ Sare' sidu'maayaihi daaka! Sinnawi Gotiyai gannya Kuryari yanga kyihizaava' sarimi tewaanna mwaalesaihilyi. Dahaa' "Ninnya kilaakevi diraginyasi naanga yune nebulya'nanyainyi yima'nideinyi," dathivaniga! ⁴ Taanga naanga yihyake' diraginna mwaalesa' yaasiwa' jima'niwaka! "Aawa, yaasiwa'na mika!" yawi'manige. ⁵ Sarevidaa'nyi ayina yihithima! Kiwinya dinikevine wawinyanna sara yesa'na Gotiyai gannya Kuryari wijaavaka sariminyaba atika diraginya wi'narya'ne yakei daa! Aawa, Kiraazitiyari limwagasaburine wi'nya'na Gotiyai sara ya!

⁶ Nabaai, Ne Eviraami avaalyabaabi! Gotiyari limwagyaakelyi. Da' dinike' "Sai yawi'na 'Gotiyai nebulya' nyidiwa,' yawi'na yaka Gotiyai dina 'Niminyi nyilimwamwake'na a'mwe yida'maraangei wimwaaahiwe'na diwana,' dina ya.'" ⁷ Sarevidaasi sarimi yawi'na "Ne Eviraami Gotiyari limwagyaakeibisaina Gotiyari limwagya'neina Ne Eviraamimire gawaalivaangeina nebwina mwaaiho," sarimi yawi'na

yipineihilyi. ⁸Nabaai Gotiyare bukuya' sinnawi sagaa' dinike' ajimya yuyangiyara limwabi'de'na “‘Yida'maraangeihilyi,' widideinyi.” Sare'na sinnawi Gotiyare bukuya' Eviraamimi yagaala tewaanya' dinike' “Nyilimwamwaanya'na ajimya yuyangiya yuyaraavina tewaanya naanga yanga wideinyi. Maariderera,” sara dinikesi. ⁹Sare' Eviraami Gotiyari limwagyaakeriji nemi a'mwe Gotiyari avaaina limwamwoinaavina Gotiyai tewaanya naanga yanga nejaawakeinera.

¹⁰Sare' dare'nesi. Kiwinyaburine wawinyanginera yi sahvara Dikevi marasi'nya'nevi dalaangewi mwaaiha!. Sare' dare'nesi. Dara dini' “Gazaigizaigi yuyagaa' Kiwinyaviya bukuyavi dinika yuya sa kuna myadinyaiginyi Gotiyai Dikevi gimarasi'nadelyi.” Sara dinike'na yuyara sara myadivi' Dikevinerera. ¹¹Nabaai, Gotiyare bukuya' dinike' “Pwai Gotiyari limwade sarerina Gotiyai ‘Yida'maraangelyi,' doziyai yuyagaa' gaala mwaaladelyi.” Sara dinike'na nemi tinna dara diraginna wangamanigo' “O, Kiwinya yivanike aane pwai kwarina Gotiyai ‘Yida'maraangelyi,' maji yivanikei daaka!” ¹²Kiwinyabwi pibulyi. Limwagasa'nebwi pibulyi. Avaalyaburaai mika. Aawa. Dinike' “Kiwinya yuya ya'gizi gaala dimwaaide'nengira mubya'bi!” ¹³Nemi Kiwinya yuya myadaanya'na yuyainaavi Dikevi nemarkasi'nya'neina mwaaiho. Sareinaavina Kiraazitiyai ayina nemuba!. Sare' dara dinike' “Gazaizari yisavi maratamarimwidaakwipi'deri Gotiyai Dikevi marasi'nadelyi.” Kiraazitiyai yisavi neminyineba kamaratamarimwidaakwe' Gotiyai Dikevi marasita'neba sai yima'naabaka ayina nemaarakelyi. ¹⁴Gotiyai “Ne Eviraamimi tewaanya naanga yanga wiaanya' Jizaazai Kiraazitiyarina ajimya yuyangiyaraavine' yima'nana!” daka, nabaai neminyina “Sahwara, Kiraazitiyai kalimwagapiji Kuryai Tewaanyarine yune naanga nebulya'na wide sari maapika!” kada' Dikevi marasi'nya'nei yima'naka ayina nemubakelyi.

Kiwinya' Gotiyare yagaalyavi mwavilayi yannesi.

¹⁵Nya'mweihi, a'mweinaavirebwinanya' yihiziwaakima! A'mwei yawiraka wilimwagarike sare' yikwiavi yavikaryaka gannya yaya yavikaryake' pwara magalazekivalyi yipinere. Yagaala piniji mye'mwagyi yipinere. ¹⁶Nemirebwi yigovaabi! Gotiyai yagaalya Eviraamimiji gamire diviya'nei yisiwiariji yune naanga nebulya'na wijaake kuna war!' tewaanya'na. Gotiyare bukuya' majinyi! “Diviya'neraava.” Kwalaalyaraavina majinyikesi. Aawa. Dara dini' “Diviya'nela,” gave pwarina dinikesi. Nabaai, Kiraazitiyarina dinikesi. ¹⁷Kuna warike' dara divanige. Gotiyai Eviraamimi yagaalya' yune naanga nebulya'na widaka wijaa' “Sara githiwe' sara yideinyi.” Sinnawi sagaa' wilimwagarake sa' widaka kwarama diviyaji kwarama naanga naanga (430) wavilayaakegaa' dividaa'nyi Ne Mozizari Kiwinya' wijayaa!. Dividaa'nya' sinnawinyavi

magalazekivalyiniyesi. Yaasiwa'nanya' mwakyinikesi. Aawa. Sinnawinya' Gotiyai Eviraamimi yune naanga nebulya'na wijaake' kuna warikesi. ¹⁸Sare' dare'nesi. Eviraami Kiwinya' yaakevidaa'nyi Gotiyai wijaake' wijaavaji kwaji Gotiyai yune naanga nebulya'na wijaakevidaa'nyi myima'nyi kyadika! Kiri' Gotiyai Eviraamimi yune naanga nebulya'na wijaake'na wijaavakesi.

¹⁹Gotiyai yune naanga nebulya'na wijaake' kuna warikevidaa'nyi dividaa'nyi Gotiyai Kiwinya' be'na wijayaa'? Da'na yinikesi. A'mwera kunnya kayaa'nanya wangadivi' dina “O, sareburi kayaaka galazekivaina yivanigoine. We!” Sare'na Kiwinya' wijayaake'nanyi. Eviraamimire yisiwiai Jizaazari yune naanga nebulya'na wijaakei bakegaa'nanyi. Nabaai, Gotiyai diraginna wijaake' naangesi. Gotiyare Kiwinyabwi maalikesi. Kiwinya sa' Gotiyai ejeliyaraavi kujayaa' a'mwe pwai Mozizai tinnyaba mwalyaakeri mamaayara kujayaa' sai a'mweraavina wijayaakesi. ²⁰Tinnyabanyai gave pwarina mi'. Gotiyai gave pwalyira. Yune naanga nebulya'na wijaake' Eviraamimi Gotiyai gavei wijaakesi. Tinnyabanyai mamwalyaakesi. Sare'na yune naanga nebulya'na wijaake' naangesi.

Kiwinya'nesi.

²¹Sarevidaa'nyi Gotiyai yune naanga nebulya'na wijaakengi Kiwinya' kayaaka yigaimanike' daaka! Arikawi. Sare' dare'nesi. Gotiyai yune naanga nebulya'na wijaake' gevinesi. Kiwinya' gevinesi. A'mwera gaala mwaabi'de'na kiwinya wijaavaji kwaji kiwinya sa kyaadike' Gotiyai neminyina “Yida'maraangeiginyi,” kanedathika! Sare' mi'. Kiwinya sa mwarikengi. ²²Aawa. Gotiyare bukuya' dini! “A'mwe yuya kwara kayaa'nanyaburi kwaakevi wila pwiyinikerera.” Gotiyai “Eviraamimi yune naanga nebulya'na wijaanya' a'mwe Jizaazai Kiraazitiyari limwabizaraavina wijaavima! ‘Yida'maraangeihilyi,’ widima!” daka kayaa'nanyaburi marulawaka'.

²³Kiraazitiyari limwange'negaa' myima'nyakegaa' Kiwinya' nevwiyinike' Juyinaavi kalavuzavi nemaremwaala'. Kiwinya' wothaayaibisa' nemaremwaaidisi Gotiyai Kiraazitiyari limwagaaza' kaneyibwaridaakwa' sagaa' nemaremwaalake' mi'nanyi. ²⁴Kiraazitiyari mabyahaa' Gotiyai Kiwinya' kanejaava' Kiwinya' neyigivaangeibisa' diraginna nemaremwaalakesi. Gotiyai yawi'na “Sahwara Kiraazitiyari limwabi'de'na ‘Yida'maraangeiginyi,’ widima!” daka neyigivaangeibisa' wakakesi. ²⁵Kiraazitiyari limwagaazahaa' mi'na kyima'na' neyigivaangeibisa' manemaremwaalyikesi. ²⁶Sare' dare'nesi. Yuyaihi Kiraazitiyari Jizaazari limwamwaasavina Gotiyare gawaalivaangeihi mwaaihasaihilyi. ²⁷Sare' dare'nesi. Sareihiri Gotiyai tewaanna yihyake'na Kiraazitiyari bavitaaziya wilayihimwaaihaka yuyaihi

yi sahwaihi Kiraazitiyai kininnakeihilyi. ²⁸Kiraazitiyai Jizaazari wilamwaaishasa'na Gotiyai yuyaihiri avaaaina yihimaara'. Gotiyai myawiri “Sai Juyai, sai Girikiyalyi. Sai yaasiwa'wawinyai, sai maremwaainadelyi. Sai kwalyai, sa' balyasi.” Sare' dare'nesi. Dazaraavina myawiri yada yawi'na “Kiraazitiyai Jizaazarina sai nimirei yima'nana!” yuya saihi gave pwaihilyi. ²⁹Sare'na Kiraazitiyareihi mwaaihasavidaa'nyi Eviraamimi gawaalivaangeihi, yisiwiaihi mwaaiha'. Sare'na Gotiyai Eviraamimi yune naanga nebulya'na wijaake' yihizaavadelyi.

4 ¹Yagaalya' yihithiwe da'na yihithivanige. Kaimale pwai ganimaangere gilyivita yuya maaradelyi. Gamire yuya wa'di'nyi kiri' kaimalei kuna mwaalike'na mamaaryivanikelyi. Sare'na kaimalegaa' yaasiwa'wawinyaibisai mamaremwaalyikelyi. ²Kaimalei mwaaidi'nyi ganimaangei sara widake'na pwara gaminyi maremwaaina yadapiji nabaai, pwara gilyivisangi maremwaaiha'. Divi ganimaangei widakegaa' yima'nadehaa'na sagaa' gawaalivaangei sahwai maremwaaladelyi. ³Sabaabi' mwaalosira. Kaimaleina mwaalogaa' Kwaakevakiyabwina mwidaa “Sa' kimaakesira. Da' minna! Sa' minna!” yawi'daa sana sana yadaa saburaavi yaasiwa'wawinyainera. ⁴Gotiyai dahilakyaakegaa' yuna yima'nakegaa' Kwaakevakina gannya gawaalivaangeri widasaabina. Widasaabina kya' a'mwe' maarakei yima'nakelyi. Nabaai, Gotiyare Kiwinyavi dalaangewi marulavemwaaidei yima'nakelyi. ⁵Kiwinya' yaamiji mididivisara “Gotiyai niminyina yawirana! ‘Sai yida'maraangelyi.’ Yawirade'na Kiwinyabwi yima!” dadivisaraavinesi. Yi neminyina “Nimi maryaavima! Nimire nyibwaaalivaangera yima'nipika!” daka Kiwinyavi dalaangewinyaraavina “Nyibwaaalivaangei ayina wimubana!” kada' sahwai Kiwinyavi dalaangewinyai yima'nakelyi. ⁶Yi sarimi gawaalivaangeihi mwaaihasa'na Gotiyai Gawaalivaangere Kuryai Tewaanyari nemire simunyangi widasaaba'. Kurya sai wilanemwaalaka nejiwiryadaa'nyi Gotiyari diraginna widivanigo “Tataai! Nimwai!” ⁷Sare' yaasiwa'wawinyaigi kuna mamwaalyigi. Aawa. Gawaalivaangeigi mwaaihi. Gotiyai sara yake'na gawaalivaangeigi mwaaidi Gotiyai gawaalivaangeraavi wijaaya'ne dimaa'deiginyi.

Poli Galeziya mwaalyaraavina simunya kwalaalya yawirake'nesi.

⁸Kigaa' Gotiyari myawiryesa'na kwaasi diraginyara (kwaasigotiyara) mamwaalyesara wila yihivwiyadivi' yaasiwa'wawinyaihi widaayadivisaihiri yihimaremwaalesaihilyi. ⁹Kiri' dahaa' Gotiyari yawirangamanigasa'na, nabaai, diwija' piri', dahaa' Gotiyai yihyawirangamanike'na Gotiyari be'na yagalya'ma'maniga! Sara yivanigasa' “Yimakera ayina nemaremwaabika! Kwaakevakiyabwi yaana!” dimanigatabaabisasi. Sahwara diraginya maayarera. Waryaanyarera. “Sahwaraavire yaasiwa'wawinyaina ayina yima'naana!”

be'na dimaniga! 10 Sareihi ayabaaibi' yawi'na “Gotiyai niminyina yawi'na ‘Yida'maraangelyi,’ yawirade'na Kiwinya' yima!” yawi'na yadivi' yirikengiji lawengiji kwaramengiji kimaaka mwaaimanigasaihilyi. Simunya dazabwi nawi'nyabwi mika! 11 Sarehirina simunya kwalaalya yawi'manige. Mi'na yage'na tewaanyaihi mwaalina yesaihilyi. Nimi yuya sariminyina yage yaasiwa'na nyima'nadika!

12 Nya'mweihi, diragina yihithivanige. Kiwinya'na nimibisaihi yima'nipineihilyi. Kiwinya' majesaihibisainyi yima'neinyina yihithivanige. Kigaa' aane piri' kiri' kayaa'na manyesaihilyi. 13 Nabalinakeinyi mwaale'na sinnawi saggaa' sariminyawinna wawena yagaala tewaanya' yihithe yawi'mwaa'. 14 Dara wanganesa' “Akai, Polimire kilaakejiki nalaaya naanga wivanikei daaka!” Sara deva kiri' niminyina maji “Waryaanyalyi,” maji yadivi' nabaai, bule'na manyijaaye'. Aawa. Sariminyawinna ejeliyai bazari tewaanna wipinebaaibi' tewaanna nyesaihilyi. Nabaai, Kiraazitiyai Jizaazai bazari tewaanna wipinebaaibi' tewaanna nyesaihilyi. 15 Sarevidaa'nyi niminyina yilaaya naanga ye'. Dahaa' yilaaya sa' gava warikavaka! Sare' dare'nesi. Sariminyina dara jalikurakivanige. Ai, sahvara niminyina yuya yipijara daa! “Wigaimwange'na nennya tinnyangi jiwa'mwanna yawaaji Polimina wijavaajainaava,” sabaabi' yawireva. 16 Nebulyabwi yihithiwe'na jawi'maniga! “Poli nemire yikamaangei mwaali.” (Yawita sasare sa' “Aala!” diwa.)

17 Pwara yilaaya yihimarivanigasara tewaanya'na myihizivaniga'. Wabwiwayagaala yihithivaniga'. Sahvara yawi'na “Neminyi yilaaya neyipika! Polimire yagaala mu'nipinera!” deva sara yiwaasa'na wabwiwayagaala yihithivaniga'. 18 Tewaanya'na a'mwera yilaaya wimaryadivisa' yuyagaa' tewaanyasi. Sarimi yilaaya nyesa' tewaanyasi. Dahaa' sariminyawi mamwaalyigehaa' yilaaya nyipija' tewaanyasi. 19 Nimire kaimiraayaihi, a'mwe' bwaranyari maa'dehaa' daanga naanga wividevaabi' sariminyina ayina daanga naanga nyivimani'. Sarimire simunyangi sarimire munyangi Kiraazitiyai yunebanna wilayihimwaaladehaa'na taanga sa' mi'na mwi nyadesi. 20 Sariminyaba mwaaimujainyi! Pikarya myavikarya'na nimire maanguraaya' yihithide'na sariminyaba mwaaimujainyi. “Gara widijiwana!” yawi'di taanga nyivanikeinyi.

Ehaavinaji Seraavinaji widake'nesi.

21 Dinyijila! Sahwaihi dina “Kiwinya' nemaremwaalana!” dina yivanigasaihi dinyijila! “Kiwinya sa' dinike' mu'nyiwaasaihi daa!” 22 Sare' dare'nesi. Dara dinike'. Eviraami gawaalivaangeraai kininnakelyi. Pwai Yizimeli, pwai Aazaki. Widaayade' Ehaa' Yizimelimi maryaa'. Gamire balaange' Seraa' Aazakimi maryaa'. Seraa' widaayade' mi'.

23 Kiri' a'mweinaavireburine widaayade' Yizimelimi maryaa'. Gamire balaange', a'mwe ne' mwaaidi'nyi Gotiyai Eviraamimi yune naanga nebulya'na kujaa' Eviraami Gotiyari limwagyaake'na Aazakimi maryaa'. 24 Yagaala sa' ke'ba'na dinikesi. Sare' dare'nesi. A'mwe sawaai yagaala wilimwagarikewaalyi. Ehaa' Mugunya Saainaayavi Gotiyai Kiwinya' wijayaake' sahirisi. Ehaa' widaayade' yaasiwa'wawinya'bisa' mwalyaake'na savirera yaasiwa'wawinyara mwalyaasarera. Nabaai, Mugunya Saainaayaviya Kiwinya' a'mweraavi pwiyinikera yaasiwa'wawinyara mwaaihasarera. 25 Mugunya Saainaaya sa' Kwaaka Areviya warike' yi Ehaa'. Nabaai, Ehaa' Anga Jeruzaalemi dahaa' mannike' sahirisi. Sare' dare'nesi. Juyara dinyina “Jeruzaalemi nemire anga naangebera,” dinyina yivanigasara Kiwinya' mididivisa'na Kiwinya sa' pwiynikesi. Davaki Jeruzaalemijiyara yaasiwa'wawinyarera. 26 Sarera diraginna mamwaalyiga'. Aawa. Jeruzaalemi munyaba Gotiyarebanyaina Kiraazitiyareina diraginna mwaaiho. Sabajiyaina yaasiwa'wawinyaina mi'. Aawa. Nenaange' Seraavireinera. Gotiyai neminyina yune naanga nebulya'na dinikeina Aazakibisaina mwaaiho. Nemi Kiraazitiyari limwadaanyaina tewaanna mwaaiho Jeruzaalemi munyabajiyaina. 27 Sare' dare'nesi. Jeruzaalemi sabanyaaina ke'ba'na dinikesi. Jeruzaalemi munyabanya'na dinike'

“Kaimiraaya maaya'gi yilaaya ja!
 Jakaji jikaji 'Su!' dinyidangana!
 Mamaaryadinya'gi yilaaya naanga ja!
 Githaasake'gire kaimiraaya naanga mwaai'dera.”

Gotiyarina munyabajiyaina tewaanya diraginna mwaaiho'na dinike'nesi. Jeruzaalemi davakiya'na dinike'

“A'mwanakevire pwai pwai mwaai'demilikera.”

Sara dinikesi.

28 Nya'mweih, Kiraazitiyari limwadivisaihi Aazakibisaihilyi. Gotiyai Eviraamimi yune naanga nebulya'na wijaakei yima'nyaakabaai' yune naanga nebulya'na wijaaka sa' maa'divi' Gotiyai dina “Yida'maraangeihilyi. Nimireihilyi,” dina yakeihilyi. 29 Ehaa' kilaa'naka a'mweinaavirebwina maryaakei Yizimeli Aazakimi kayaa'na yina yaa'. Yi Gotiyare Kuryai sara yaake'na maryaakeri kayaa'na yina yaa'. Sabaai' Kiwinyabwi yivanigasara Kiraazitiyari limwadaanyainaavi kayaa'na neyivaniga'. 30 Kiri' Gotiyare bukuya' beri' dini'? Dara dinike' “Widaayadesi gawaalivaangelyi sanaari duthaaso! Sare' dare'nesi. Ganimaangere yuyangi widaayadevirei maaarannera! Arikewi. Gamire balaangevirei gavei maarade'na duthaaso!” sara dinikesi. 31 Sarevi, nya'mweih, yaasiwa'wawinyavireina mi'. Aawa. Balaangevireinera. Gotiyai neminyina “Kiraazitiyari limwamwaasara nimire. Nimire tewaanya yuya maapi'dere,” dinikeinera.

Kiraazitiyai nevwiyinikeinaavi neyaramaara'nesi.

5 ¹Nemi tewaanya diraginna mwaalya'neinaavina Kiraazitiyai bala! "Yuyabura pwiyinikeraavi yaarima!" daka nevadaihasamaara! Sarevidaa'nyi kuna diraginna dithaaka! "Yaasiwa'wawinyabulyainyi ayina nyima'niwidika!" da'gizi Kiwinyabwi myawi'dinna! ²Du'nana! Polinyi kave dara githivanige. Gimi yawi'na "Gotiyai niminyina 'Yida'maraangelyira,' dana! Sare'na nimi Kiwinya' yadi kilaakejiki nyidapika!" Sara yija' Kiraazitiyai yake'na giminyina gihaimwagake' yaasiwa'nanya' yima'nade'nanyi. ³Ayina diraginna gizalikurakima! Gazaizai yawi'na "Yida'maraangeinyi yima'nima! Pwara nimore kilaakeji' nyidapi'de'nanyi," yawi'na yoji sai Kiwinya yuneba yanee tivikisa'nei yima'nade'nanyi. ⁴Gimi yawi'na "Gotiyai nyidana! 'Yida'maraangeiginyi.' Nyidathe'na Kiwinyabwi yima!" Sara yawi'na, yina yiwaanya'na Kiraazitiyari yagalya'ma'mwaa. Gotiyai yange'na gihaimwagakevi bwala'mwaa. ⁵Sare' dare'nesi. Nemi Kiraazitiyari limwadaa Gotiyare Kuryai gannya diraginya' nejaavada yilaaya yadaa yemwaa'ho. Aayagaa' Gotiyai yuyaraayaba "Yida'maraangeihilyi," nedathe'na yemwaa'ho. ⁶Sare' dare'nesi. Nemi Kiraazitiyari wilamwaa'ho'na kilaakeji' daya'nebwi yaasiwa'nanyasi. Nabaai kilaakeji' madaya'nebwi yaasiwa'nanyasi. Nemi Kiraazitiyari limwadaanyabwi pwaraavina tewaanya nevu'nadevina wawinya yadevwi naangaangesi.

⁷Sinnawi Kiraazitiyarina kaanyave'na nayaa wawaginyaiginyi. Giminyi aai galagirihi'mwaka! Sare' nebulya' mamidinyi be'na yivanigina! ⁸Midinya saburina Gotiyai givwaramaa'manikei sara magiziwaakyiwa'. ⁹Dadaanya' "Pamidakade yiziya maalikemili' biretiya naange' pamidakadesira." ¹⁰Sare' kiri' nimi sainyi Kiraazitiyari wilamwaa'he'na diraginna yawi'mwa "Sara yawi'manige Galeziya mwaalyara sara yawipi'dera. Aane pibwi kibwi myawiri, avaa'na yipi'dera." Nabaai, a'mwei giminyina taanga gizaavanikeri Gotiyai kayaa'na wiadelyi. A'mwe naangei dingaka? A'mwe maalikei dingaka? Sareri Gotiyai wirivikiradelyi.

¹¹Nya'mweigi, pwara niminyina kwaasi widina "Sai widina 'A'mwera kilaakejikaavi da'nyina kyapiji Gotiyai "Yida'maraangeihilyi," ' widathelyi." Sara widiwiji kwaji kayaa'na kuna mi kanyipidika! Savidaa'nyi nebulya' waraji kwaji yisavi Kiraazitiyai balakevine wagila wivwa'nyabwi mena kyima'nadika! ¹²A'mwera "Kilaaka ditha'nyila!" dadivi' gimire simunya kayaaka yivanigasara kunnya kilaakejikaavi yune'na da'nipika! ¹³Sare' dare'nesi. Nya'mweigi, sahwaiginyi Gotiyai githahilaka! "Wila pwiyinikeri yaarima!" Sara githahilakaka sara kagizivwaramaara' tewaanna mwaaihinyaiginyi. Mi'na githiwe'na dara myawi'dinna! "O, Kiwinya' manevwiyyinika. Su! Su! Kilaakejikine

yuya tewaanyaji kayaa'nanyaji yima!" Sara myawi'dinna! Sara myinna! Aawa. Gyaarakeigi ja'mweraavina kale gyada yaasiwa'wawinyaigi wigaimwanna ja! ¹⁴Sare' dare'nesi. Gotiyare Kiwinya yuyavi aaya kaavilya' dara dinike! "Gimi saiginyina kale gyadevaaibi' pwaraavina kale gyana! Duhaimwana!" Yi yagaala sahirisi. ¹⁵Siwaaka, malakayaaryarabisaihi myima'nipina! Maanga, sinna tika daya, mala sazabwi myipina! Sara yapiji, yithaanyi, gazaihizaihiri kayaaka yuna nyigainipidika!

**Kwaakevakiya yawisabulyi, Gotiyare Kuryare
yawisabulyi saburaarinesi.**

¹⁶Da'na yihithivanige. Gotiyare Kuryai sara kagithozi kuna sara ja! Sara ya'gizi gimire simunya ayabwi mi jitheiginyi. Arikawi. ¹⁷Sare' dare'nesi. A'mweina simunya yawi'daanya' Gotiyare Kuryai yawi'de' yaamiji dathiwanna. Nabaai, Gotiyare Kuryai yawi'de' a'mweinaavire simunya' dathiwanna yanesi. Sare' dare'nesi. Gotiyare Kuryare simunyasi a'mweinaavire simunyasi yikamaangewaalyi. Sare'na Kuryai githada ginnya simunya' "Pibwi ja!" kagithozi sarebwi minneiginyi. ¹⁸Sare'na Kuryai kuna gimaremwaalajai Kiwinya' mamaremwaalyi gyatheiginyi.

¹⁹A'mweraavire simunyabwi yuyaina yawi'manigovulyi. A'mweraavirebuliyara dara yadivisangi. Ata limwangebwi yina. Yaawaryaraavirebwi yina. Girikita'nanyabwi yina. A'mweraavi a'mwengi yaasiwa'na kayaa'na limwangebwi yina. ²⁰Yisaraavi, silaangeraavi, nyilyari, laweri, silingaaminaraavi a'mwa'mweraavi yilaayabwi yina, kulaka maarya'nebwi yina. Giri'nya, lakya, kwalya dazabwi yina. Yikamaangebwi yina. Maangebwi yina. Pwaraavire tiganaarya yadivi! "Maa'mujainyi," dina. Sinna tika widaya'nebwi yina. Kunnya yaya makinyina yadivi', pwaraavina kale mwia'nebwi yina. Jaapaina yadivi' pwaraavi wanganakina. Kumijiyaraavi birala yadivi! "Nemi tewaanyaine," dina. ²¹Pwaraavire naangengina "Maa'mujainyi," dizabwi yina. Pwaraavi tamakina. Biyaaya saza nadivi' yimaka wilina. Nabaai biyaaya nyina kwarama kayaa'nanyabwi yina, avaanna kayaa'nanyabwi yina. Sara yadivisangi. Nabaai, sasarebura piburaji yadivisangi. Kigaa' githevaabi' diraginna ayina githivanige. Sasare sabwi minna! Pwara saza yadivisaraavi Gotiyai nayaa mamaremwaalyi yadera Gotiyare yuyanna mamaari yipi'derera.

²²A'mweraavire simunyabwina kayaa'na yadivita kiri! Gotiyare Kuryai nemire simunyanna maremwaaaida yisila nawi'nyabisanna tewaanyainaavi nemwaaihivanikelyi. Sare' dara yadaanyasira. Pwaraavina kale neyada, simunyangi yilaaya yadaa, kwaamu'nanyabwi yadaa, pwara kayaa'na neyadaapiji sinna tika yarai madayi neyade'na

diraginyaina mwaidaa, bwiwanna yabwi yadaa, pwaraavi tewaanna wiadaa, sara widadaanya yuyagaa' sara yadaa, ²³kave yigoina nennya yaya mamakinyadaa, simunya kayaa'nanya' "Aala," divanigoina diraginna maremwainadaa Kuryai nemwaaihadelyi. Sara yadaanyainaavi Kiwinya yagaalyasi manejinikengi. ²⁴Kiraazitiyai Jizaazareina dara yawi'manigo. A'mweinaavire simunya diraginya myaanbwi Kiraazitiyare yisaviri mi'na yeramwo. Sare'na kayaa'nanyabwi manemaremwaalyikeinera. Yi simunya kayaa'na dika widadeji wima'nadeji yisaviri mena yeramwo. Yuya dazabwi divanigo. Aala! Sarebwi Kiraazitiyai balake'nanyi. ²⁵Sare' "Kuryari mwaiho," daaza' yi nabaai Kuryari kaanya yamaryaana! Gamire yagaalya' midinaana! ²⁶"Nimi tewaanyainyi. Pwara kayaa'nanyarera," madaanna! Pwara simunya kwalaalya yawipi'de'na myaanna! Pwara kanevilavapiji birala myaanna! Aawa. Kuryare diraginyavi mwalaana!

"Pware taanga dimakwona!" widake'nesi.

6 ¹Nya'mweihi, sarimi dara yennipija' "O, nemijiyari yiwetawakya' jima'niwaka!" Gotiyare Kuryari mididivisaihi sari nayaa yavada'gaina jila! Birala, maanga nudipidika! Aawa. Kave bwiwanna widina jila! Ginnya mwaalyabwi nayaa jawika! "Nimi kave mwaala'muji Saataani avaalyabwi yide'na nanyimwaaihadika!" da'gizi Kuryari diraginyavi dimwala! ²Da'na yihithivanige. Gazaizari taanga widaa'nyi wigaimwange'na taanga sa dimakama! Duhaimwana! Sara ya'gizi Kiraazitiyare kiwinya' mi'na jithesi. ³Sare' dare'nesi. Pwai myawiranna! "Pwara kayaa'na yivanigasara maalikera, nimi naangeinyi. Dazabwi myi yideinyi." Sara yawi'de sa' kwaasi yawi'devulyi. ⁴Kiri' gazaizai gannya yivanikengi nayaa yawibwata yannelyi. "Tewaanyasi," dozi sare'na yilaaya yannelyi. Sai myawirina "Pwai kayaa'na yivanike', sainyi tewaanna yivanigeinyi," sabwi myawirannelyi. ⁵Aawa. Gazaizai gannya yivanikengina Gotiyai yawibwata yadelyi.

⁶Kiraazitiyare yagaala yihiziwaakadivisaraavi pwaihi kadika wi'nadivisaihi tewaanya yuya jaapaina yipineihilyi. ⁷Simunya kayaa'nanya' myawipina! Gotiyari kwaasiyara pihadika yipijaraavina Gotiyai yuna yawi'manikelyi. Sare' dare'nesi. A'mwe pwai buridaza yi sahini maaradelyi. ⁸Sai kayaa'nanya buridazai kayaa'nanya maaradevaaiibi' pwai a'mweraavire simunyabwina gamire kilaakevi yajai kayaaka yigainadelyi. Kiri' pwai tewaanya buridazai tewaanya maaradevaaiibi' pwai gamire kuryari tewaanya buridazai yi Kuryai Tewaanyari yuyagaa' yuyagaa'ne gaalyabwi maaradelyi. ⁹Nemi tewaanyabwi yadaa simunya waryaanya myawiraanna! Sare' dare'nesi. Kuryari diraginna kuna yaajaina Gotiyai dahilakageaa' tewaanyanna maradeinera. Sare'na nayaanna yadawaaji maa'na maneyinanna!

¹⁰Sarevidaa'nyi yuya'na yaajahaa' yuyaraavi tewaanna wiaana! Yi, Kiraazitiyari limwadivisabulyiyaraavi kinidakaavi diraginna tewaanna wiaana!

Yagaala aaya'nesi.

¹¹Pwai nimire yagaalya' kyavikaryiwa' dahaa' pikariyisari' maarena ninnya atasi pikarya yihyavikarivanige. Nimire pikarya naanga danganyila! Pikarya sa tinna wanganapiji “O, Poli nebwina neyavikariwaka!” dithinyide'nanyi. ¹²A'mwera kilaaka mwasimaginna yawi'na “Kiraazitiyarera yawi'maniga' 'Kiraazitiyai yisavi kabala' kilaaka daya'nebwi maalikebwi yima'niwaka!' Sare'na sinna tika wida'daawoji Juyara kayaa'na naneyipidika!” Nabaai “Sahwara Kiraazitiyai Jizaazarine yita yovihirarannikevina maanga nanedipidika!” deva “Sarinnya kilaakejikaavi ditha'nyila!” wijiwaakina yihiyanigasare. ¹³Sare' dare'nesi. Kilaaka daya'nebulyiyara Kiwinya yuya' navika yadivi' myadivisare. Aawa. Sahwara yawi'na “Juyara neminyina dinyina 'Kiraazitiyarera sahwara kilaaka daya'nebwi Galeziya mwaalyaraavi yivanigasara tewaanyarera!' dinyina yipika!” Sara yawi'na yadivisa'na yihiziwaakivaniga' kunnya yaya makimanigasara. ¹⁴Sabaai' ninnya yaya' makina myiwineinyi. Arikawi. Nemire Naanga Jizaazai Kiraazitiyai yisavi balakere yaya' makimanigesi. Yi, balake'na Kwaakevakiyabura kadathiwaga' sabura manyimaremwaalike'nanyi. Kiraazitiyai bidaa'nyi nimire simunya aya' balakesi. “Kwaakevakiyaburaavina mamwaalyi yideinyi,” yawikeinyi, Naangei yisavi sara balake'na. ¹⁵Kilaakeji' daya'ne' yaasiwa'nanya', kilaaleji' madaya'ne' yaasiwa'nanyasi. Gotiyai mudikeinaavi nemwaaihade' naangesi. Sare'na, Kiraazitiyai yisavi balakeri yaya' makimanigesi. ¹⁶Yihithiwe' yivanigasaihi Kiraazitiyareihi, Gotiyare Yizireliya nebulyaihiri Gotiyai gannya kwaamu'nanyaburi tewaanya yihimwaaihana! Gotiyai kale'na yihigaimwagana!

¹⁷Aaya' yihithima! Aane pwai kwai taanga manyijaavanna! Sare' dare'nesi. Jizaazari widaayadinyainyina pwara kayaa'na nyesa'na nimire kilaakevi yiwihwaarya naange warikengi. Sare'na Apozeliyainyi Kiwinyabulyiyara taanga manyijaavipina! ¹⁸Nya'mweihi, nemire Naanga Jizaazai Kiraazitiyai yuyaihire kuryaraavi yange'na yihigaimwagana! Sahirisi. Nebula naangesi.

Poli